

Ribuan Ahli Umno Membanjiri Stadium Bukit Jalil Sempena Ulangtahun Umno ke-66

mStar Online

Mei 11, 2012

Oleh MAZWAN NIK ANIS

KUALA LUMPUR: Stadium Bukit Jalil kini bertukar menjadi lautan merah dengan kebanjiran ahli Umno dari seluruh pelusuk negara yang berkumpul bagi meraikan sambutan ulang tahun parti yang ke-66 pada Jumaat.

Orang ramai mula membanjiri stadium seawal pukul 3 petang turut membuktikan Umno bersedia untuk menghadapi pilihan raya umum tidak lama lagi.

Pada pukul 6 petang, stadium yang dapat menampung kapasiti 60, 000 orang telah penuh dan ramai penyokong yang terpaksa berdiri.

Presiden Umno, Datuk Seri Najib Tun Razak dijangka akan menyampaikan amanatnya pada pukul 9 malam.

Pada tahun ini sambutan ulang tahun Umno ternyata berbeza kerana ia diadakan di stadium selama tiga hari dengan pelbagai aktiviti telah disusun hingga Ahad ini.

Pasti ada yang melihatnya sebagai perjumpaan politik, sambutan ulang tahun kali ini cukup meriah apabila ia diserikan dengan tiupan trumpet dan nyanyian lagu-lagu patriotik.

Bukan itu sahaja, ketika ketibaan bekas Perdana Menteri, Tun Dr Mahathir Mohamad dan isteri, Tun Dr Siti Hasmah penyokong turut bersorak menyambut kedatangan beliau.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/5/11/mstar_berita/20120511211041&sec=mstar_berita